

Aruba a conoce su representantenan

Pa festival A-B-C di Ranchera di Centronan di bario

Diasabra anochi **Centro di Bario Brazil** tabata di fiesta un biaha mas cu festival di ranchera di centronan di bario, cual a desaroya rapido y den un ambiente festivo y masha disciplina.

Bunita e anochi aki tabata di mira cuanto di nos grandinan tabata sinta den publico y a sali e anochi aki pa diverti scuchando nos cantantenan y con tur hende a goza.

Na final despues di e resultadonan, mi no a scucha ni un "hiek" di for di publico, cual a demostra cu nos ta suficiente maduro pa ricibi resultado di hurado manera el a ser presenta y cu e participacion di nos cantantenan tabata caba un logro grandi.

Cu acompañamento musical di **Mariachi Perla di Aruba**, 23 cantante a subi escenario pa logra un di e 6 lugarnan pa representacion di Aruba na Bonaire den luna di november.

Kenrick Kock di C.B. Tanki Leendert a habri e anochi hopi bon, cu bon mantencion di compas y bunita voz, cantando **Mazatlan**.

El a wordo sigui pa **Olga Tromp** di C.B. Ayo cu e cancion "Des den". Olga tambe a muestra di tin bunita voz, sinembargo na dado momento el a haya su mes ta improvisa.

Bertha Willems cu semper ta un cantante fuerte seguidamente a representa C.B. Dakota cu

"Tu solo tu". Bertha a demostra cu e ta keda un di e voznan grandi di ranchera di nos isla.

Otro cu bon voz di ranchera y fuerte como cantante ta **Nel Werleman** representando C.B. Savaneta, pero e tampoco a cay den e finalistanan cu "El pecador" ya cu esaki mas bien no tabata ranchera tampoco.

Magaly Sneek a cumenza cu poco nervio, pero mes ora a gara e publico y a duna Centro di Bario Tanki Leendert un bon representacion cu su "Amor Eterno".

Hopi aplauso **Mervelin**

Kock a logra cu su "La reina es el rey" y su presentacion riba escenario tabata hopi bon, y cu un voz fuerte bunita, sinembargo e no a logra den e clasificacion.



MIRTHA DIRKSZ

Mirtha Dirksz tambe di C.B. Tanki Leendert, tabata e cantante femenino cu voz angelical. Mirtha a logra hopi aplauso cu su cancion "Le falta un clavo a mi cruz". El a duna bunita presentacion, pero na cierto momentonan el a falta compas. Pa e voz cu e tin e lo porta un ganador si e logra mantene compas di su cancionnan.

Roberto Orman representando C.B. Brazil, semper tabata un competidor fuerte, pero e anochi aki e no a cay den clasificacion cu su cancion "Por todo el año".

Un cantante cu mi a goza sigur pa su presentacion tabata **Shurna Barbara** cu a presenta cu e cancion "El Cascarabel", representando C.B. Savaneta. E bon voz cu e tin y e sjeito cu el a hinca den e cancion dificil tabata un placer pa mira y scucha. E no a clasifica sinembargo.



BENITO CASUELA

Benito Casuela, semper popular, a wordo bautiza como Benito "Aguilar" Casuela. Un cantante masha simpatico y admira pa hopi den e diferente festivalnan cu e sa presenta. Benito a representa C.B. Brazil cu "Cantinerio" y no a logra clasificacion.

Otro cu por a yega mas leu den puntuacion tabata **Dora Everon**, di C.B. Piedra Plat, cu a canta "Alma de Acero". E problema di Dora tabata cu e tambe a falta compas aki y aya.

Un cantante cu no a clasifica pero cu mester tene bon cuenta cune pasobra dia pa dia e ta progresando mas y mas, ta **Soledad Rijna**.



SOLEDAD REINA

Soledad a representa Piedra Plat cu "Que manera de perder" y ta keda e figura pa otro festival. Soledad a gana e premio di mas popular pa e cantidad di carchinan cu el a bende pa e festival aki.

Glenda Raghunath a canta e cancion "Paloma Negra". For di e momento cu el a resona e voz potente, por a sinti cu e lo termina den e clasificadonan, si no tin otronan cu ta mihor. Glenda a representa C.B. Savaneta y a termina na di 6 lugar.

Otro di e voznan bunita di ranchera di nos isla ta **Elvira Eckmeyer**. El a representa C.B. Noord cu hopi bon presentacion sinembargo no a logra clasifica cu "Que seas feliz".

Otro cu bon voz representando C.B. Piedra Plat y cu a ricibi

hopi aplauso tabata **Jaime Robles de Medina**. Cu su "Cartas Jugadas" e no a logra clasificacion pa Bonaire.

E cantante cu no a logra aña pasa, pero cu e aña aki a bini mas fuerte, sinembargo no a clasifica tabata **Indra Stamper** cu a representa C.B. Lago Heights. Indra a resulta e cantante mas cometa e anochi aki como e strea di futuro. E tin bon voz, cu un



INDRA STAMPER

stage performance fuerte y cu hopi bon articulacion. Na final ta hopi aplauso tambe el a ricibi, sinembargo su "Amoralo ranchera" no a logra suficiente punto pa clasifica.

E cantante **Roland Angela** di C.B. Noord tame tabata fuerte den su presentacion cu "Balas Perdidas". Un veterano cu por a sinti tambe cu e lo por clasifica, locual a sosode tambe terminando na di 3 lugar y ricibiendo masha hipi aplauso pa su cancion.

Mes ora despues e competencia pisa a yega pa Roland, y tabata trata di **Marcelino Paesch** representando Centro di bario Brazil. El a canta "Nuestro Juramento" y su stage performance cu e cancion aki a yuda masha hopi te cu e veterano di escenario a bin termina na di dos lugar di e festival.

Cerca e damanan **Glenda Peña** cu a sigui, a haya su mes cu un estorbo di sonido, sinembargo el a canta sin preocupa cu esaki y masha hopi aplauso el a ricibi tambe cu "La misma gran Señora" representando Club Universal. Glenda a resulta e dama cu mas tanto punto y



GLENDIA PEÑA

ademas a gana tambe pa su trahe china blanco masha bunita. El a termina na di 5 lugar.

Danilo Vrolijk normalmente ta fuerte, pero e anochi aki su voz a lague na caya. Danilo a representa Club universal cu "ponle precio a tu cariño". El a demostra di tin voz fuerte pero na cierto momentonan den e cancion su voz a bay lague.

Judith Quandt tambe a representa Club Universal cantando "Tu carcel", pero e problema di dje tabata mas bien afinacion di su tononan.

E cantante cu por a sinti tambe cu e lo ta un finalista, y kizas hasta ganador di e anochi.



MARIO KELLY JR.

tabata **Mario Kelly Jr.** Un cantante cu por a canta su "Tu voz" sin microfono mes, y e aplauso cu el a ricibi di e publico a demostra caba e acohidu pa por ta ganador. El a resulta tambe maximo ganador di e anochi.

E anochi a cera cu **Ernan Angela** representando C.B. Noord cu "Si nos

Sigui lesa Pg.

Continuacion pagina 30



ERNAN ANGELA

Dejan". Aki por a pensa cu e lo bira e gran sorpresa den e ganadornan di e anochi pa e manera sublime cu el a interpreta su cancion, y Ernán a termina tambe na di 4 lugar.

No por keda sin menciona e trabao excelente di miembronan di hurado dirigi a **Sr. Erick Chong**, cu pa 5 pa 12 ya tabata tin nan trabao casi cla y a pone e toque final despues den oficina. E ultimo

participante a termina su cancion 5 pa 12 anochi, mustrando con lihe e anochi a desaroya presentando 23 cantante ya cu 2 a ay afo na ultimo ora.

Sigur ta cu na november Aruba lo tin un representacion digno cu e seis ganadornan di e anochi aki. Un pabien sigur ta na su lugar pa **Sylvia Tromp**, pa su tarea di maestra di ceremonia y su conocimiento di musica mexicano. Ora cu e 23 cantantenan a caba di presenta, el a mustrami su lista di ganadornan y tabata como si fuera ta e mes a dicidi kende ta gana, cu un accertacion excelente. Tambe un pabien pa directiva di **Centro di Bario Brazil** pa e organizacion fantastico di e festival y e publico cu realmente tabata "un publico di oro".

Juby Naar.